

焦太史編輯國朝獻徵錄

焦太史編輯國朝獻徵錄卷之一百九目錄

錦衣衛

宋忠

萬貴

錢進

朱曠

葉廣

陳宣

陸炳

朱希孝

王良

李昇

周瓚

述杲

孫忠

楊仁憲

楊本

周拱元

四明趙昌期

全校

吳興茅元儀

錢塘徐象樞

刊行

目錄終

錦衣衛都指揮使宋忠

忠節錄

宋忠錦衣衛指揮使智勇有名洪武二十九年百戶有論死非其罪者忠疏救之御史劾忠太祖曰忠率直無隱爲人請命何罪爲并宥百戶戊邊三十年御史劉觀劾忠作威福逆名累調鳳陽中衛明年平羗將軍都指揮齊讓討西夷無功以忠爲參將從征虜前將軍楊文計之凱旋復官錦衣建文初勅忠以都指揮總邊兵三萬屯開平盡簡燕府護衛壯士從忠聽忠節制又以都督徐凱屯臨清耿璈屯山海與忠相犄角且約張瑄謝貴爲誠爲內應及呂等遇害

靖難兵起敗居庸關守將余瑄據其城忠率所部至
居庸關不敢進退保懷來 文皇謂諸將曰宋忠擁
重兵懷來必爭居庸宜乘其未至先擊之諸將皆曰
敵衆我寡難與爭鋒宜固守以待其至 文皇曰此
非爾等所知當以智勝難以力論遂統精兵八千卷
甲倍道趨懷來先是獲諜言忠激諸將士云爾等家
在北平者並爲燕府所滅盍努力復家營報國恩
文皇急令其家人張故旗幟爲先鋒遙呼其父子兄
弟相勞問無恙諸將喜曰我家固安皆屬宋統兵
我欺
遂倒戈走忠倉卒列陣未成 文皇一麾渡河鼓噪
而進忠敗死之子謙鎮南衛軍後請戍邊尋賜死

錦衣衛指揮使萬貴

實錄

錦衣衛指揮使萬貴山東諸城縣人充吏坐事謫編戶霸州成化初以女爲貴妃恩歷陞錦衣衛指揮使成化十一年七月卒命有司給賻并葬祭視常例加隆貴處閭閻曾執役公門頗知禮法每受重賞輒憂形于色見其子驕奢過度則戒其母妄費曰官家賜物皆注于曆他日復來追汝無以爲償子三人喜通達而通尤恣肆

錦衣衛指揮使錢通

實錄

錦衣衛指揮使錢通字文達其先涼州人祖荅錦衣衛指揮僉事父奄卜指揮同知景泰中奄卜從征湖廣有功未上卒通襲授署指揮使成化中賜今姓尋陞實授十八年理鎮撫司事二十一年理衛事弘治六年奉命往彰德按藩邸事未竟中熱卒年四十五通叔父四人同侍禁中貴震一時通未嘗有所憑藉與人交雅傍恂恂不事諂諂計聞特賜諭祭

驍騎將軍錦衣衛掌衛事都指揮使朱公驥墓
志

倪岳

弘治庚戌十二月朔 上視牲南郊公職侍衛侍佩
刀翼 輦以行趨走過勞比暮疾作越十又五日夜
漏下二鼓遽卒所與爲僚屬及族里親舊相與奔視
嗟咨洒泣 朝之公卿大夫亦皆弔祭傷善人之奄
忽也訃 聞 上悼惜遣禮部諭祭命工部治墳以
葬蓋特恩云公諱驥字尚德姓朱氏世爲京邑大興
右族至曾祖大始因子貴贈武德將軍妣郭贈宜人
祖喜洪武中起家儀衛司積功至錦衣衛右所正千

戶考鑄副俱以公貴追贈驃騎將軍都指揮使祖妣張妣丁俱贈夫人公生而龐厚性寬大不喜刻核嗜讀書喜學問樂與學士大夫游痛蚤失怙事母極孝養既嗣職掌所事公勤明敏藉藉有聲同列久更事皆讓不及也嘗使湖浙一毫不苟取少保兵部尚書于公名知人聞公賢以女妻焉天順改元丁丑坐累謫戍威遠甲申召還任成化丙戌以兵部薦擢指揮僉事佐理衛事戊子畿內盜不時發敕公提督官校捕緝時以五城職巡邏者率玩愒怠事乃命吏部偕公遴選去留擇才以充不拘故常而公復摘發渠惡

遠近肅然辛卯民飢攘奪以苟朝夕所司逮捕得斗
粟者輒坐死公爭曰此窮民情可憫也獄上多從末
減有妖人真惠者僞爲書誘惑同類多不遵語事覺
逮繫數十百人皆當死公曰可罪者獨惠耳餘愚民
何辜事聞惠竟坐死餘釋戍邊有衛卒從公者嘗
者休聞其鄰偶以妖書傳觀者亟告公期謂發得實
公斥曰此妄耳取書焚之滅其迹仍遣卒歸諭其父
老始大驚悟散去先是公在謫適虜人寇因從總兵
官高陽伯往禦之就陳斬獲虜囚把禿王以歸至是
兵部論功進世襲指揮同知戊戌進指揮使命掌

衛事尋進都指揮僉事甲辰 上察公忠實可任特
勅兼理機務公小心慎密未嘗妄興一事亦未嘗輒
遣校上下安焉冬進都指揮同知前後所積擒捕功
甚夥公有所奏列率推諸官校以故從公蒞事者多
累階至顯官而公不與也丙午 上嘉公勞勩特詔
褒獎進都指揮使仍掌衛事累荷繡春刀綵幣寶鑑
時新珍味及續綱目諸書御製連環諸詩之賜每進
講經筵輒得入侍與宴歲南郊大祀輒蒙賜蟒衣以
爲常公在位久恩眷優渥委任甚至公亦端確有守
不爲勢利怵嘗奉命撻忤旨者或詈公用小杖 上

怒命中使詰責數四公具以實對卒不易自持甚謹
而待人極恕諸屬中有可用者維持與進任之不疑
凡有重獄苟可以求生者必爲之盡心焉邇以兵部
遴選軍政大司馬獨奏疏稱公老成得體敦厚不刻
時以爲得其賢云

錦衣衛掌衛事都指揮使贈右軍都督府都督

同知葉公廣墓志

李東陽

公姓葉氏諱廣字大用其先出處州青田今分景寧縣地也初公世錦衣衛爲總旗少孤賴母范夫人鞠成之俾學書藝旣代役識者曰是非行伍中人領東廠緝事詳慎不泄成化八年以功擢試百戶蒞本所事屢奉勅出勘重獄所在傾聽悉辭弗納江西藩臬賦詩贈之遼東武臣奏其地有金礦珠池公奉命往勘躬涉境外察其姦事遂寢東人總之至今有劇盜詔捕甚急或陰跡所在以告公曰盜固有罪特其自

犯爾何得爲遲者後自訪得之有校尉緝越城盜公疑之執不變公曰若殺此人後獲真者柰何不數日真者果獲二十一年實授爲百戶明年遷副千戶理鎮撫司刑鞫讞精密有姦婦製毒假婢手中其夫集坐死公以婢不知情辯釋之有校尉誣平人爲盜反坐執者都察院守者相仇殺逮繫百餘人戶部進內藏銀數失實繫者亦衆皆止坐罪者自餘平反縱釋多至不可計弘治五年擢署指揮僉事明年本衛缺員兵部薦其名時孝宗簡在已久御文華殿親閱之命莅衛事實授爲僉事總都城溝浚事人不敢犯

出勘寧化王府疑獄務存大體勘大明川投獻地卒
歸於民督捕中外盜賊獲數千百人而鄧村壩賊尤
劇數年累遷都指揮僉事北山賊號靠山王者勢甚
猖獗方發官軍出捕比至則公已追官屬擒其巢滅
之一日矣 上偉其功遷都指揮同知又勘外戚莊
地及藩府儀賓獄皆集事而還 今皇帝正德元年
遷都指揮使掌衛事凡 郊祀耕藉視學經筵諸大
禮無弗預減役從省浮費政令一新官屬皆改視易
聽下至校役亦仰戴不置總糾訪事尤極慎重戒諭
官校必以天道國法爲說詞義懇切人多感動蓋隱

然有陰德焉前後所被賜如蟒龍衣飛魚衣及銀幣
諸物甚備二年加從一品俸壽至七十特贈榮祿大
夫右軍都督府都督同知命禮部諭祭者三工部治
葬事皆異數也公器局魁碩敏而能斷遇事不苟動
先自往威貸旁午屹然不爲動自壯至老未嘗少易
又能體悉羣情不過苛刻用是獲于上下交口贊譽
翕然同辭其卒也尤悼惜不置云

榮祿大夫後軍都督府右都督掌錦衣衛事贈

太子太保陳公寅神道碑

今上皇帝入繼大統維時扈從諸臣從龍而起榮藉
龍靈薦陟華顯流光錫祚垂裕無窮豈非千載一時
之遇哉若右都督掌錦衣衛事陳公其一也公諱寅
字敬夫其先山東武定州人曾祖玘洪武中以功授
燕山左衛副千戶因家京師祖貴父政皆世其官弘
治庚戌獻皇帝之國政以才選授管群牧所卒于
官公襲父職年二十四卽小心勤事朝夕弗懈人咸
以遠大明之旣危蹕來京進陞錦衣衛指揮僉事有

詔公等子孫皆與世襲尋令公提督官校管理京城
街道又以督理諸大工宗廟及皇史宬成陞指揮使
管西司房事九廟成陞都指揮同知掌本衛事慈寧
宮成陞後軍都督府都督僉事仍掌衛 奉先殿成
陞都督同知皇穹宇成陞右都督 上恭冊皇天太
廟以公等扈從勞加服色俸級而前後所蒙白金綺
幣及羊酒等賜不可勝紀公重厚簡默器度恢弘果
斷剛方事無留滯隨所任使克舉其職以故受 上
簡知眷寵特異云歲乙巳公感未疾具疏懇乞解任
允之仍奉命支月俸量給官校應用公寢疾逾五年

嘉靖己酉五月二十八日卒下第距生弘治乙卯十一月享年五十有五公少孤克自樹立事母張太夫人至孝撫弟吳友愛備至官跡武階之極而謙約畏慎安靜老成乞身早休履游以終可謂補履之盛也已

掌錦衣衛事太保兼少傅左都督陸炳傳

掌錦衣衛事太保兼少傅陸炳浙江平湖人祖塋以尺籍隸錦衣衛獻皇帝之園安陸還充儀衛司總旗塋之子松遂得事上于潛邸上入繼大統松用從龍功累官至都督僉事炳松之子也中武舉會試授副千戶積功至指揮僉事己亥上南幸承天至衛輝行宮夜火侍衛倉卒無在者獨炳身負上出於火中上識其姓名即拜都指揮掌衛事累陞至前職嘉靖三十九年十二月暴卒上深悼之手詔稱其爲國發逆盡忠追贈忠誠伯謚武惠祭葬有

加仍命兵部官其子繹爲本衛指揮僉事今左都督
朱希孝經紀喪事護其家炳雄黠多智數善迎合
上意自列校驟膺公孤出司巡徼入典直贊自郊
廟以至諸禱祀皆得與焉親近尊寵卽勲貴大臣莫
能望也任豪惡吏爲爪牙多布耳目銖兩之奸悉知
之富民有小過者卽榜掠文致成獄沒其貲產其所
夷滅者不可勝道累貲至鉅萬豪侈自奉營別宅十
餘所皆崇麗稱甲第分置姬妾其中紈綺寶玩所在
充牣供張不移而具炳時遊處其間東西惟意又置
良田宅于四方若揚州嘉興南昌承天等處皆有莊

店聲勢震天下然是時上數起大獄煩頗保護無
事所全活亦衆又仰藉廣交寵取聲譽故終嘉靖之
世無發其奸者隆慶改元始以言官奏劾以其子繹
緒等官籍其家

實錄

陸炳傳

湖廣總志

陸炳者安陸人也炳生而沉鷲健武有謀畫長身火
色鶴行左右背裂而上窺望之如神人父松故以校
尉給事興邸 肅皇帝既入嗣大統松以從龍恩授
錦衣衛指揮掌衛事炳中嘉靖己丑兵部武舉松卒
襲錦衣衛指揮己亥隨 上幸順陵一夕駐衛輝府
行宮災 上亟召諸宿衛大臣武定侯郭勲俱遲至
獨炳直宮門因得扶 上升輿避火 上自是益親
幸炳比 車駕還京詔炳掌衛事薦加都督 上既
以春秋高退居永壽宮奉修玄事詔成國公朱希忠

等六臣直贊無逸殷炳占數焉復加保傳柱國賜在
外得乘肩輿禁中許馳騎與五臣埒體炳掌衛事久
喜調察民間陰事有抵扞者輒羅織成獄其家立傾
京師富賈無一得脫者人畏憚之甚於乳虎顧獨折
節延納士大夫士大夫以此稱其賢先是咸寧侯仇
鸞用事陵轢縉紳驕恣無人理分宜初與之交好已
聲勢相軋鸞遂密奏分宜父子不法狀 上寢踈分
宜會鸞病疽且死炳心右分宜乃嗾鸞舍人上變炳
因發其勾連僣答事從其家得號帶爲証 上大怒
時鸞已死詔斫其棺僂鸞屍于市而分宜由是復得

幸於上華亦在政府素與分宜不協而給事中吳
時來主事張紳董傳策同日上書交論分宜分宜以
吳張皆華亭公所取士董又鄉人疑默爲位使泣訟
于上前上亦猶豫以問炳不敢言第封進癸丑
會試錄請上自裁而私劾實當所以調停之者甚
力上意漸解其以智數能周人緩急如此上天
威嚴重言官稍不稱旨卽被廷杖炳每戒杖者謹護
持之以是多得保全建安李家宰默炳武舉出其門
下始自浙江左轄炳引入爲南太常卿掌祭酒事尋
陞禮部侍郎改吏部晉尚書后坐趙文華誣構死詔

獄時 上意猶叵測朝士不敢出弔者炳親爲經紀
含殮事以千金購卹之還其喪於家炳性勤於職事
每戴星出入善揣合人主意且淨姻親貴羽與滿朝
故始終榮遇至於沒齒隆慶中人始言其生前將爲
不軌者有詔削奪 爵典貲產盡沒入官

柱國太保兼太子太傅贈大傅謚忠僖掌錦衣
衛事後軍都督府左都督朱公希孝墓志

呂調陽

太保掌錦衣衛事左都督朱公諱希孝字純卿國朝
元勲世裔其先鳳陽懷遠人七世祖諱亮從高皇
帝起義以功授燕山中護衛千戶六世祖諱能從
文皇帝靖難功第一封成國公給誥券世襲沒於
交趾之役追封東平王謚武烈高祖諱勇嗣公死正
統土木之難追封平陰王謚武愍曾祖諱儀祖諱輔
考諱鳳俱嗣成國公爵儀贈太師謚莊簡輔謚榮康

俱贈太傅而定襄恭靖王則其同母兄也王立朝三十餘年位至太師忠謹無過士大夫雅重之太保少王二歲出入先後嘗相與偕家庭之間自相師友勲德位望並擅稱一時論者比之石叟石建而才畧爲過云嘉靖十三年蔭授錦衣勲衛皇穹宇太廟大工落成 世宗兩廕成國公子姪一人爲百戶遂以兄廕累秩授都指揮使管衛事外城工完陞都督同知奉勅提督輯捕陞右都督以類奏功轉左大朝門工成加太子太保 世廟英察雉朝御稀闊而羣臣情態罔不照悉太保忠勤恭慎簡在右素入仕甫二十

年驟至極品兄弟貴盛罕與爲儔既受命督捕辦全
明肅校卒無敢妄冒以希功者士民晏然先是都下
告訐成風一遭連引輒至破家人皆自危及本衛缺
負掌印部臣方議推選既未及上忽有特旨以屬太
保都人舉手加額道路相賀世宗益倚任之未幾
授特進光祿大夫柱國賜乘肩輿召入直西內凡繁
急邊情及重大工作輒下密諭諮詢日或拜三至皆
手自裁荅無不稱旨穆宗踐祚錄潛印舊勞今
上登極錄總理東宮儀衛恩眷愈隆操履彌恪先後
以擒獲奸細并類奏功及皇極數御官工成廡于百

戶鎮撫者共六人游加太保兼太子太傅增賜歲祿
幾百石掌衛事十餘年踈節闊目務在與民相安一
切鉤鉅苛察之令悉皆屏去非極惡大愆不窮以法
澆俗爲之一變萬曆改元星象示異會有大獄莫決
都下洶懼恐其誣引太保奉 詔命會鞠乃致齊虔
禱越宿詰問盡得其情罪止囚一身無枉濫者于是
人情大定星亦旋滅其鎮靜類如此初定襄王病既
請給假日侍醫藥臥起扶掖不離左右王薨哀慟悲
切慙悴見於容色縉紳私憂之以爲過戚及喪事則
困憊滋甚不復朝謁竟至不起此其篤厚倫誼得之

性植蓋不自覺者居常父子兄弟間頃刻未嘗廢禮
然真愛流洽又匪直爲儀貌虛文者近作別墅擬名
怡園意在奉兄園成而兄弟俱不待其可哀已榮康
素嚴重燕居危坐如對大賓定我侍立終日無敢歛
側每朝會出入必衣冠拱候迎送于門太保進隨兄
步武疾徐先後未少有違此乃乎自狀其兄者以今
日考之則其家庭恩禮可以勵世訓俗者拒止人所
聞見者哉狀稱與士大夫交忠信不欺處內外端黨
情慈周匝且明習國家典故每論議一事舉其所未
聞不了了埴世承平不以技能才略自表見然胸中

鈴輻醞藉莫可窺究嘗與人較射連發中的見者驚服而口絕不言射篋中所貯有籌邊六策言切時務未嘗示人以草親交諷之建白竟未敢輕易也其他若工大小楷師趙文敏能得其骨法精別兩代名家法帖圖盡真贋百不爽一諸如此類不暇悉舉余特論叙其大者云爾卒于萬曆二年甲戌三月二十三日距生正德戊寅得壽五十有七卒之日 天子震悼 賜祭十一壇給齋粮麻布金幣銀寶 詔所司治葬諸卹典視常制加厚贈太傅謚忠僖

錦衣衛都指揮使王君良墓志銘 張璧

王君諱良字本善拙菴其別號世爲湖廣江夏人祖仲禮父瑾母南氏君少警敏未束髮知向學雖盛寒暑不輟卷瑾翁見輒喜曰兒他日必大吾宗遂俾受經于里中師公愈自刻厲坐茲病母氏固止之始廢學然慷慨有廩志忽一日頓足歎曰丈夫處世當爲國家樹功邊境徒踞踞坐一室曷爲哉乃徒步走京師每見人語大奇之亡不人人願與交遊正德改元潘中貴者受命總鎮兩廣辟君爲贊畫適雷嚴鳳凰諸蠻寨作亂時議出兵征勦鎮巡合辭謂君可督軍

君卽日就道遂與將士約曰今往惟爾衆盡相與戮力惟命敢茲玩者誅罔貸衆咸曰諾乃始整隊行至則分兵巡勦大破之斬首無算蠻獠底定鎮巡稱賞卽以君捷奏上聞而嘉之授錦衣千戶旣還鎮又值樂昌之變請討且徵狼兵會土官知府岑猛桀驁不發兵鎮巡憂之顧無可遣者乃復托君君單騎至猛所諭以朝廷恩威利害猛憚然懼不浹辰兵馬雲集君叶相調度乃分遣精銳入搗賊巢乃潰酋衆就縛降者以千數自後屢捷歷陞都指揮使正德丙子擢廣東備倭授勅以行時海賊多出沒君慎守禦

嚴斥垢以待之有巨猾張敬趙十八日者行掠海上
君計擒之餘孽尚校君欲盡收故少緩縱卽傳有飛
語君指天日誓曰良爲國家祛害寧畏此言使吾私
賊賊難再獲矣無何賊果詣軍門降餘黨收捕咸伏
其辜諸皆以君忠誠所感至爲頌曰靖海錄梓焉巡
按御史高君上其功惟公中郁副留守督領直隸官
軍更番入衛會惟好用事君懼禍反遂謝病歸日與
客清坐抵暮因倦容雖居京邸而心遠塵囂如在林
壑人以是賢之君澗貌魁碩舌上舉能直抵鼻端性
仁煦人有急難必爲援賑治家有矩矱故子姓克承

厥志童僕皆爲盡力乃君晚年得自適焉居官廉備
俸海上不受賂遺爲留守入京時羣衛所例有贐公
一切罷去雖茗果拒弗受時留守王君憲徇介重許
可屢遺書頌君清白絕人其取重如此

南京錦衣衛指揮使李君瑤墓志銘

梅純

君姓李氏諱瑤字天器先世鳳陽府泗州盱眙人曹國公追封岐陽武靖王之玄孫也王諱文忠以外戚事高皇帝從征四方屢勦勞勛甚著追前元太子於絕塞而生致其皇孫后妃及金玉重寶以歸曾大父諱景隆襲封公爵洪武末文廟舉兵靖內難臣民共推戴承大統會周王以舊隙愬於朝公遂停爵大父諱佑父諱夢凡三世歷五朝皆閑居於家母關氏以天順癸未十月九日生君生而岐嶷異常父母

甚鍾愛之甫數歲以古人詩口授輒記誦不忘既長
學日進蓋自先世雖由武功起家而雅尚儒術若金
華蘇平仲烏傷王子充天台徐大章會稽唐志淳皆
國初名儒悉延致私塾討論經史故到君父子其流
風尚未艾也人謂貴介公子既不求仕而能不廢書
史近世纔一見也鄰有老儒許子貞方隱居著書素
慎許可比見君輒曰吾閱人多矣未有器度如是子
者他日光復前人之業其殆有望乎因以一女許聘
君既家學有自又得許時質其疑德器之成資藉於
內外者深矣弘治壬子 敬皇帝御極篤念先世封

王子孫有不沾寸祿者詔有司起送京師量加恩典
俾主奉祀既至各授以南京錦衣衛指揮使而君與
焉金緋騎從赫然改觀鄉閭榮之君受恩感激不敢
自暇嘗曰吾職雖無階設施以圖上報而歲時慶賀
儀節諸所得與者容可少怠自是雖大風雨不廢平
居養親雖厚而自奉甚約俸祿有餘別創新堂於舊
第之偏日與弟璣設酒具牲供養爲二親歡暇日則
與二三友生於名山勝水間持觴登眺分韻賦詩發
舒精神探索物理不徒爲宴樂流連也越數歲二親
相繼以天年終君執喪哀毀踰禮比服闋更不復事

遊翫日惟諄諄訓迪諸子務進脩德業思無忝於先
王先公每日誦古人所謂世祿之家鮮克由禮等語
爲戒其孳孳尚德率類此正德初逆瑾當路竊弄威
權大獄繁興廷及勲戚依勢者遂擅廢臨安主賜第
君與臨安切鄰因怙忿鬱鬱成疾迨甲戌之夏其左
脇上若有積氣逾月外視無見而內痛日深醫云殆
陰瘡也不急開則膿益潰矣君憚弗許又兩月痛轉
劇始命鍼之膿果涌出經旬瘡口未合膿復出如初
若是者凡六七而元氣以耗遂不可支矣竟以是年
九月十八日而終得壽僅五十有二嗚呼世事姑息

而禍者豈但君一疾而已哉抑予又嘗聞君家先
世未停時傍墓山口忽啓一泉衝其塚後不久禍
作迨弘治初復有剽石橫墮中流正逆阻衝處水遂
分散且墓傍前後偏生揖松不四三年蔚然交蔭木
幾乃有錦衣之命蓋吉凶之來自有定數而不可或
逃也觀君家二事則智者必知所自處已

孝廟卽位之五年以開國功臣封王者六人俱輔佐
高皇帝平定天下有大勲勞今其子孫有不沾寸祿
與編氓無異者欲量加恩典俾奉其祀乃下詔命令
所司其實以聞於是吏部奉詔惟謹卽各行所在查

取赴京既而開平王曾孫常復取自雲南寧河王玄孫鄧炳取自湖廣岐陽王玄孫李璿東甌王玄孫湯紹宗皆取自南京比至命各授指揮使職轉送兵部皆定以南京錦衣衛使各近其墳塋夫當太平盛世不忘報功此固聖天子之大德而所司急於將順亦賢輔佐之公心也時承行者吏部尚書三原王恕驗封司郎中安陸孫交兵部尚書鈞州馬文升武選司郎中蘇州徐源皆一時名宦也四家至嘉靖十年復加侯爵實由孝廟開其端後人乃得成其美中惟韓國公猶未韋復尚若有待云

錦衣衛都指揮周公瓚傳

潘垣

周公瓚字朝獻先世江都人高祖璠以元平定鎮撫
吳元年歸附授西安衛百戶曾祖玉果戰功陞大河
衛指揮僉事但參伯景鑑襲公爲景後得襲初委遣
軍器獎別罷良稱幹濟才三年總本衛被運時紅火
軍困負過累萬嚴鉤考節浮費禁侵漁宿貸一清士
有餘積成化乙巳山陝河南三省飢本府檄部果
十萬往賑派河西上經歷百隆卒無稽程當時賴之
總督都御史薦其端謹公勤熟知清務命爲把總管
順淮安等八衛運限水幾署都指揮僉事遇恩部實

授公統馭有法撫綏有恩士不告勞嘗患疽危甚部下有請禱願以身代者其得士心如此曾參漕協守缺員廷議合薦上曰可遂以都指揮克漕運參將點守淮安援例改錦衣衛帶俸感一時知遇事有當爲力勤不怠有當言從容贊翼外示恻恻而中懷蹇蹇舊各總歲運多掛欠恒稱貸權要輒倍其息而運官因以爲利公防儉嚴籌盡精粮無掛欠官有餘羨二三年積至數萬前此未嘗有也公有心計因而積勞亟血上疏乞骸骨火保尚書馬公留之甚力詔不允且加勗焉明年又力疾饋運江南再疏行勸

而疾日增制總督張都御史冀其起而緩其奏遂卒
于官年五十七公天性仁孝恭儉好禮愛人室無姬
妾事伯母大淑人尤謹旣喪哭盡哀至負土封墓君
子善其知所報撫遇士卒有恩常市善藥療其病死
則飲而歸之尤侈掩人過使知自改一時莫不以爲
長者蓋武臣之魁施也于正字元貞別號與石少喜
讀書負大志選克郡學弟子員應舉未就以廢棄大
河衛指揮僉事卓直矯厲既專衛政則先聲奪人時
昔賄驕訟勝者皆歛縮患窮卹困部中長老嘖嘖歎
賞督撫都御史李蕙表薦遽許巡狼把總不少貶損

以猶倉曹倉曹趙郎中媒藥致罪罷歸安時養勝無
所怨尤客至則與劇談神仙星氣五行娓娓多辯博
若事關國紀民隱則又凝情動色都御史陶琰督漕
廉公無罪表復遶洋之任條上便宜數事至今行之
會河北山東劇盜起遶絕糧道時都御史張縉在漕
府以謀勇奏領兵事時漕舟千艘阻于白洋河出奇
制勝賊不得逞會官兵大集賊逸而南奔悉衆追襲
擒斬五十餘級申解總制軍門爲左右掩蔽不見錄
事于漕府辯于 朝進階三品官指揮同知 勅守
備歸德兼管武平等處以都指揮體統行事至則簡

什伍時教閱會諸生談經講藝有古儒將風居九月
忽不樂輒引疾東歸買田澧水之陽結廬躬稼寓情
墳典五經三史及諸外家之說靡不鑒覽詳說所著
有皇極經緯六壬秘并集古奇方諸書藏于巾笥未
行後陶公拜鎮淮以漕運叅將薦不果尋復起爲湖
廣運粮把總累疏辭免江西寧藩稱亂留科從以將
材薦終不起別家孝友與人尤篤信誼父病疽嘗口
吮毒液弟久瘵與同卧起夜授溺器遶左數都御史
文錦死大同之難奴獻計欲分其所蓄金怒叱之
俟其妻子歸完塋焉父貧時有所借貸主者多物故

乃召其子孫授之力田所入歲與鄉井通有無海濱
疆曠得所需丐者皆欲盡死力性輕財好施予苟赴
急則倒囊傾困愛客喜過從雖吐茵罵座亦不之厭
又善獎寒畯常折行輩納交尤克念貧賤之交每顧
卹師友妻子惟好惡太明一言以立然諾至死不變
嗟乎勲業不著旂常材猷徒膏耒耜命也可謂金王
君子者與辛年六十有七

錦衣衛指揮同知遯杲傳

實錄

遯杲直隸安平縣人初爲錦衣衛校尉能通篆隸捐
揮劉敬等以爲腹心天順初以都御史楊善薦授百
戶尋以擒妖賊功陞副千戶又以曹吉祥薦陞指揮
僉事石亨死陞指揮同知杲性陰險殘忍干事無所
避嘗奉 旨伺察中外之不法者屢撫拾羣臣細故
濫及無辜坐罪者甚衆朝野側目其死也人皆快之
方其得志時慮爲仇家所攻退居杜門絕客非素厚
者不敢干以私故爲 上所寵任云

錦衣衛副千戶孫公忠墓志銘 程敏政

公諱忠字克誠姓孫氏上世居蘇之長洲祖曰思道
元樞密院判知大寧義州事 國初戰歿松山子嗣
與始以二州內附公之考也公宣德初從在軍中卽
銳意功名然無以自見適 宣廟遣使人朝鮮及招
諭阿木河之地從楊木答兀叛去者公慨然請行旣
至宣布 朝廷威德聽者凜凜朝鮮國王加禮甚恭
阿木河叛者皆願內屬公遂與來宣德壬子復遣使
朝鮮及忽剌溫公旣兩出使熟諳其國道路遠近要
害及其土俗人事蕃人無敢詭之者明年忽剌溫及

建州夷侵朝鮮掠其境朝鮮以聞 宣廟復遣公等
以手詔問忽刺溫及建州兩酋見公等稽首請罪悉
還其掠者正統辛酉復遣使建州旣還從太保朱成
公北征丁卯詔公等以金幣使瓦剌至繁腰山遇中
國男子十一人南走虜追及將盡殺之公謀竭囊貲
爲贖又作胡語解之虜悟遂以乃納鞬中十一人者
得不死已巳再使時虜酋也先已敗盟入寇遂劫公
等北去至大金山柳園縣適 英廟在狩見公等慰
諭久之各進署一職明年扈蹕還京師後七年丙子
英廟復位乃授公錦衣衛百戶如已巳詔又三年遂

謝病返故鄉以宦授其子賢居十有三年而終時歲
化庚寅冬十月丙寅也享年七十有三天性淳篤不
類武人奉母甚孝其謝病而歸也遇母夫人喪時年
已七十哀毀踰禮手植松檟數百章卒以憂瘁致疾
不起友其弟斌無纖芥反目意身使異域三十餘年
每行則正使必以行營棧宜付公公亦悉心爲之致
力常先事而計軍中肯綮蓋庶幾古之善使者與

錦衣衛百戶楊君仁愨行狀

王世貞

君諱仁愨字君實世爲吾太倉人有支族於魏隸籍
錦衣衛遂亦稱其衛人初名質後更今名君年十二
而王父宗禹困離家訟得疾場兄弟弱不任中外政
有悍僕且叛去君請於族紳奴招白挺擊之且死而
後逐之衆近六公市市人咸少君不爲懼君不憚歸
市自是絕跡矣既冠乃謂其兄弟曰吾先人之大故
也以訟吾不可以不自其弊業以辭飲中止君不可
竟勝之而後歸塋也然自是日益貧君一旦慨然歎
曰丈夫安得終辭職田畝以修耕植業車蓑一具錦

理七入耶獨身之京師叩公車門上書請益東南海
戍廣斥堠爲腹心保障不報當是時海固無警而易
君言且以爲狂君自是久困公車間然稍穎脫見其
叅伍鉤鉅之技而中貴人司大官水衡者聘君往以
爲司計君鉤駁出入數塞其旁漏卮而稍寬其內公
私盡裕中貴人善之著爲絮式嘗從先帝幸承天
用供億亡害資白金還往兼傳君尋倦其役因而更
籍太醫有冠服矣買大第長安里日過從賢士大夫
益市牛酒爲歡一時翕然稱之謂有陳遵鄭當時風
而所幸愛故人衣食其家若歸居數年廢著轉徙貧

逾於舊然所幸受故人過從士大夫交口譽之君名
日以盛陸太保炳者督錦衣親騎初亦有所疑數司
君久更以爲賢檄之幕俾充親騎使長領鉤察當是
時太保貴倨甚而縱騎橫所察其人非死卽家立破
而身實緣從恣姦利更籍以取功名至得帥君獨持
大體務爲寬平長者數數戒其下慎之母令西曹鄭
吏腹誹我錦衣一片地有天無日也而太保心愧之
乃更積君勞試百戶矣會倭寇起東南士所不矚君
昔言頗以然而其於此事益自氣益發舒深語不諱
先後輔相徐公李公及今高公張公奇君才以語楊

大司馬而檄之邊佐總督籌畫時虜廷益徙近塞所
招納亡叛以十萬計號爲陔升其壯者勒習騎射度
入寇輒用以嚮導餘卒耕蓄自給稍稍收其羨以贍
虜益富強而中國自鎮城外輒棄爲旣脫不復墜旦
夕仰度支錫粟稍不繼卽坐檄君殊恨之乃行求近
地稍腴而易自保者召丁壯田之盡鬻其家貲以充
牛具穀種居二歲所收羨逾於出旁產益拓君又募
死士給以衣甲善馬使訓伺虜他出卽掩其穹廬幽
子女或盜其橐駝騎騾百十群以歸入之虜情益得
君歎曰是陔升可誘而致也令縣官畢我力我能使

陔升挾其虜酋來卽不可而能使陔升自疑虜亦疑
陔升上下交疑而我乘其間功同全有也爲書上之
大帥及圖畫虜中形勢與防禦攻取之法甚詳所以
用君策或未盡卽用之或不必贊而虜中人懾君間
來歸比比大帥第君功第一賜白金千百戶實緞
錦衣朱太保推較君協理西川房日益貴重用事而
君且病矣君之得隸錦衣募也蓋多先御史大夫公
力云而先大夫之督薊遼也遼東病饑人相食君時
有行役杖馬箠叩門請得通登萊恤先大夫忙收君
策而禮之又時時資其家迨先大夫惟諺傳及書君

歲時素體銳意居間請救百方不已也居平慷慨語
不肖曰人生旦暮死耳卽死得足下一言曰故義士
楊君傳足矣蓋又數年而不肖家難白強起游趙魏
間抵君書曰得無有意乎楊君傳哉君業卧床弟報
曰吾雖病小緩之更一二歲可傳也蓋君陰已得虜
竇謂阪升且有變庶幾如嚮者策有功名也而君病
益甚亡何卒君卒之二載而虜酋縛阪升之魁十餘
來款塞賜封如呼韓邪故事 天子所以冊拜將相
大臣典物極厚然亡能名楊君矣者嗟哉君爲人高
鼻深目面骨隆隆起強力自給見語一義事眉端解

榻色喜也遇人有緩急卽投袂而應之雖中夜扣門
亡不應也卽以翌日突烟令計無所之而方夜宴客
且滿數十人婦簪珥衫袂歲朝在酒家所不恒歸素
故楊太常仲芳當伏法哭之市又嘗經紀沈光保子
剛喪其二家子弟相通聞如骨肉君之北上也則墓
隧毀矣五服之內無解裝者迫其貴而歸餘奉高大
其墓立戟斥置旁墓田丙舍爲蒸嘗資以其餘較贍
貧族歲爲常君歿而不能具棺歛諸良君善者爲調
費也可謂節俠沾沾自信者矣君享年六十始娶陳
氏有一女適姚李繼蘇氏有一子文淵慷慨善騎射

亦隸錦衣頗緹騎伍娶倪氏女一適劉思廉蓋君歿
之二年而文淵以狀請文淵所爲狀請者謂不肖知
君深將微惠於鉅公賢大夫以不朽君於異日不肖
有成言矣其爲死者請則傳之爲生者請則狀之唯
鉅公賢大夫擇焉以使不肖存辭地下謹狀

錦衣衛鎮撫楊本傳

忠節錄

楊本河南中牟人或曰浙江處州人初爲太學生精于遁法建文初募才略士本應募試兵部授錦衣衛鎮撫時吳王撫軍一日本請王出兵及登臺見大水森茫平階而一軍皆不見本曰此天譴也帥師北向本常持一鐵棒重三十斤臨陣馳突北兵披靡不敢前遂破之自南北交戰諸將皆敗惟本與平安有功本景隆忌本不以聞已而本約日出戰諸軍爲後繼景隆謂諸將曰今日倖之一圍瓜我輩種熟乃爲他人採去耶竟擁兵不救本上疏略曰刑局三千罪

莫大于不孝人倫有五德莫大于盡忠忘君虐民者不可以不懲喪師失律者不可以不罪今都督袁宇與耿炳文征討喪軍士二十萬于燕地皇上憐其爲太祖故舊不忍加刑又魏國公徐輝祖征燕私存姊妹之情虧喪士馬皇上召回京師命大教場操練軍士又曹國公李景隆四月進兵喪失軍馬無限皇上責問乃歸罪臣下乞假臣爲大總兵用一能官召募義勇招撫軍伍凡先鋒叅謀軍政稽考等官臣自當保舉仍特命親王爲監軍疾馳燕師則可免生民于塗炭奠宗社于太山矣本遂帥孤軍獨出被擒不屈

繫北平獄後 文皇攻濟南失利趙王奔還北平恐
人心搖動索本殺之 文皇大怒以本有才略且欲
用之也

錦衣所鎮撫周拱元

忠節風

周拱元湖廣沅州人少讀兵書出入辰沅蠻中相交
易蠻人信之建文初應募入京試騎射答策授錦衣
所鎮撫軍前差遣占侯輒中主將令引步兵防餉舟
靖難後不屈死之

國朝獻徵錄卷之一百九

焦太史編輯國朝獻徵錄卷之一百十目錄

都司

花茂

瞿能

謝貴

楚智

卜萬

馬宣

莊得

彭二

彭聚

孫太

朱鑑

張皂旗

唐禮

楊松

張信

王清

許寧

張世忠

李任

韓青

周英

白弘

宗禮

左君弼

余斌

陳儀

江洪

趙本

韓斌

張鵬霄

王邦直

張建節

四明趙昌期

校

目錄終

吳興茅元儀

錢塘徐象榘刊行

焦太史編輯國朝獻徵錄卷之一百十

都司

都指揮使花公茂傳

花茂巢縣人元季起兵從陳世光歲丙申三月歸附
癸卯援安豐敗張士誠兵又于鄱陽湖戰滅陳友諒
甲辰平武昌授威武衛百戶累以功多洪武八年十
月陞神策衛指揮僉事十三年調廣州左衛勦平陽
春等縣叛賊十四年收捕清遠英德翁源博羅諸縣
山寨十五年討海南叛蠻出海捕倭十九年東莞龍
川興寧南海香山翁源民作亂統兵討平之二十年

正月陞廣東都司指揮同知夷電白等賊二十一年
破歸善等縣賊寨二十二年四月陞本司都指揮僉
事五月陞都指揮同知賜誥子孫世襲廣州左衛指
揮使是年擊南海香山黃連等寨二十四年七月收
勦連州廣西湖廣等處徭賊三萬餘語在事紀二十
六年正月致仕 上命其子爲東勝右衛指揮僉事
茂仍蒞事四月統軍蕩滅東莞筭岡等處二十七年
茂上言請徙廣東沿海地方東莞香山等縣連逃蛋
戶爲兵又奏添設沿海依山廣海碭石神電等衛所
二十四處築城濬池收集海島隱料無藉等軍仍於

要害山口海議立堡撥軍屯守詔皆從之二十八年
閏九月征捕海南等處山峒黎賊明年二月入覲
上慰獎之且曰爾回今次于英來朝朕將用之六
月茂回會番禺後山等寨賊叛命英同肇慶衛指揮
夏忠領軍捕之獲其首從鄧佛蔭等七十五人卽遣
英赴京十一月茂在任奉制陞本司都指揮使三十
年正月 上命英爲廣東都指揮僉事與張春共殄
賊首黃黑面等地方靖寧四月二十日茂卒賜葬牛
首山安德門外廣人祠之于粵秀山英武毅有父風
自以軍功陞本司都指揮使永樂中累建大勲後致

仕

副總兵都指揮使瞿能

忠節錄

瞿能不知何許人號勇有名洪武中以四川都指揮使與同知徐凱統兵從涼國公藍玉渡大渡河擊西番有功又與都督徐司馬爲副總兵從都督聶緯討建昌叛酋月魯帖木兒又副藍玉破賊雙狼寨建文君卽位從李景隆爲裨將攻北平能力戰勢甚銳與其子帥精騎千餘殺入張掖門景隆忘之不令速進以故北平得爲備白溝河之戰能奮勇衝擊殺傷甚衆北平兵遂却渡河能及其子與北將房寬接戰寬敗文皇馬阻于隄幾爲能所及得高煦兵合又會

大風起南師陣動諸將皆狼狽走獨能父子力戰死
之精兵萬餘人皆沒無一還者

北平都指揮使謝貴

忠節錄

謝貴未詳始所自起洪武二十五年以錦衣指揮僉事陞河南都指揮僉事署山西行都司事二十八年坐趙隆事法當死太祖宥之降河南衛指揮僉事建文君卽位慮北平有變兵部尚書齊泰薦貴智勇以爲北平都指揮使俾覘燕動靜令其練兵卽有事先發後聞已卯六月貴部署七衛兵布城中迫王城外牆以木柵斷端禮四門文皇命指揮張玉朱能等帥護衛勇士爲之備能請先擒謝貴張昺文皇曰彼防守旣嚴猝亦難擒須以計致之今姦臣遣中

人來遠護衛官屬宜悉依所坐名收之就令中人名
貴易付所逮者則貴易必來來則縛之一夫力耳乃
匿壯士端禮門內遣召貴易久之乃至衛從甚衆門
者叱止之惟貴易得入至端禮門壯士出擒之將士
移時乃知皆散走玉等率勇士捕之是夜攻九門已
克其八惟西直門未下指揮唐雲單騎諭守者散乃
盡克九門于是上書清君側之惡而靖難之兵起矣
貴等卽日被害

北平都指揮使楚智

忠節錄

楚智不知何許人洪武中稱驍將數出塞有功歷陞
都指揮使建文初守北平尋召還從李景隆統騎兵
遇北師輒奮力戰夾河之役死于陣

大寧守將卜萬

忠節錄

卜萬未詳所自建文時爲大寧守將謀勇自貞每戰輒先登靖難兵畏之部將陳亨欲降畏萬不敢發文皇乃行反間貽萬書盛稱獎萬極詆毀亨絀識牢密召所獲大寧卒解縛厚賞之置書衣中俾歸密與萬故使同獲卒見之怪問守者曰彼何爲得此守者曰遣歸通密書於卜都司以故得厚賞卒跪告守者曰能爲我請得偕行惟命是從不敢望賞守者爲請遂俱遣而竟不與賞不得賞者終不平至卽發其事劉貞陳亨搜卒衣得與萬書遂執萬下獄死籍其家

未幾亨竟降貞遁遼東大寧相繼不守矣

守薊州都指揮馬宣

忠節錄

馬宣不知何許人建文初爲都指揮守薊州靖難師起宣謀起兵迎拒已而張玉朱能來戰宣與鎮撫曾濟閉城堅守 文皇遣將反復諭之不下玉樵衆急攻宣率衆出戰玉遣精銳衝入其陣宣戰沒濟亦死之或云宣被執罵不絕口死

西涼都指揮莊得

忠節錄

莊得洪武末爲西涼都指揮召至北平爲燕兵右翼
出塞有功建文初隸宋忠麾下懷來之戰惟得一軍
獨全後壁城侯盛庸與北師戰于夾河得奮力助庸
斬大將譚淵已而北師以勁騎乘暮掩擊得力戰而
死

北平都指揮彭二

忠節錄

彭二亦未詳始所自起建文時爲北平都指揮有威名靖難兵起殺謝貴彭二咤曰早不爲我謀急躍馬大呼市中集兵得千餘人欲直入端禮門文皇遣健卒格殺之兵亦散

北平都指揮彭聚

忠節錄

彭聚北平都指揮也與孫太副宋忠守懷來忠敗聚力戰死當是時諸將校爲靖難兵所俘者百餘人皆不肯降以死大半不可考矣

北平都指揮孫太

忠節錄

孫大都指揮從宋忠戰懷來先登頗有斬獲靖難兵
擇善射者並射太中矢流血被甲慷慨喪血力戰奮
呼陷陣死之

行都司都指揮朱鑑

忠節錄

朱鑑北平行都司都指揮守大寧北兵至大寧諸將
陳亨房寬皆降鑑力戰不支被縛罵不絕口死之建
文君加卹典 文皇愾中所謂萬段凌遲處死者卽
鑑也

都指揮張皂旗

忠節錄

張皂旗者逸其名不知何許人建文時以都指揮充
偏將力能挽千斤每遇北兵輒揮皂旗先登軍中呼
爲皂旗張轉戰山東屢有俘馘至夾河力戰死猶執
皂旗不仆北軍皆異之

都指揮唐禮

忠節錄

唐禮歷官都指揮靖難兵起盛將軍以徐凱敗于滄洲引兵出德州營于東昌禮素稱戰將令將騎兵殿後而以孫霖爲先鋒營滑口靖難兵夜襲破之擒禮霖遁走

都指揮楊松

忠節錄

楊松不知何許人積功官都指揮北兵南狗耿炳文使松爲先鋒據雄縣北兵圍雄松令軍士登城大罵北兵益憤破城執松不屈死之

驃騎將軍都指揮使張公信傳 朱睦㮮

公諱信字彥實輔從兄也洪武三十二年舉鄉試第一永樂初拜禮科給事中尋遷刑科都給事中九年擢工部右侍郎會河決壞民田廬上遣信來視信乃繪圖馳奏曰臣訪得祥符魚王口至中深二十餘里有舊河岸與今河岸平浚而通之俾循故道則水勢可殺詔從之發河南民夫十萬相度濬治工竣信還京時 昭皇監國遣人勞視居頃之浙江守臣奏江塘潮決 昭皇復使信往治不數月修築如故洪熙初轉兵部左侍郎賜齋金綉甚腆輔以信爲同族

奏乞改授武階以是調懷遠將軍錦衣衛指揮同知
尋擢昭勇將軍本衛指揮使宣德改元都督蔡福叛
交趾命信帥兵往勦事寧擢四川都指揮僉事未幾
進驃騎將軍都指揮使在蜀十五年紀律嚴整羗夷
莫之敢犯正統十年六月卒于官年七十一歲上
賜祭仍命有司歸葬祥符縣東之白塔原

論曰余嘗過汴之東郊謁驃騎祠墓已荒廢鞠爲茂
草徘徊瞻眺未嘗不愴然而悲也因憶少時聞驃騎
爲諫議封駁糾彈無所顧忌貴戚爲之斂跡及命平
交鎮蜀而又勲庸赫著傳曰有文事者必有武備驃騎其庶幾乎

廣東都指揮使王公清傳

王清字一寧合肥人世以武功爲濟寧衛指揮慷慨多勇畧常提兵入衛宣德間率所部出喜峯口及至鴛鴦海覘虜累立奇功正統二年陞廣東都指揮以親老不遂迎養陳情乞分俸于原衛詔許之蠻夷叛據大藤峽清往討有功戊辰總督廣東軍務已巳協同總兵駐軍高州廣賊黃蕭養劫鄉民叛衆十餘萬圍攻廣州清帥舟師赴援至沙角尾水淺舟膠失利被執賊素知清威望不敢害清投水不死因寄衣還廣城中大書一詩兩捧天書鎮百蠻偶因兵敗不

生還飄零身世輕千葉磊落襟懷重似山半夜愁吟
珠海寺幾回夢墮鬼門關憑君獨有衣相寄爲我招
魂宇宙間數日賊擁清至城下使諭衆開門降清罵
不絕口遂遇害朝廷憫之加予爵二級清善律詩所
著有建案集行於世

羽林左衛帶俸署都指揮使許寧傳

羽林左衛帶俸署都指揮使許寧字志道直隸江都縣人正統末以禦虜功由舍人陞至錦衣衛正千戶已而襲父職爲羽林左衛指揮使以薦陞署都指揮僉事守禦柴溝堡成化初充大同遊擊將軍累立戰功陞署都指揮同知六年陞都督僉事充總兵官鎮守延綏十八年陞都督同知仍充總兵官鎮守大同時虜衆入寇與鏖戰二日一夜虜解去降勅獎諭二十年以下米莊之敗降羽林左衛指揮同知閑住弘治五年以言者交薦陞署都指揮使坐營管操未幾

李時弘治十一年十二月贈都督僉事寧自東髮行
陣凡經一百十九戰被二十七鎗麾下知名士若劉
孚神英李杲等十餘人性沉毅自負甚重不屑進取
一時稱邊將者殆莫能過大同之役寧知虜勢方熾
欲持重以俟動而代王督趙甚急至使衆哭於轅門
寧憤激以出遂至於敗議者惜之子泰試武舉第一

叅將張世忠傳

永平志

張世忠字顯甫先山東日照人宣德間祖俊由臨洮
衛鈐推調衛始爲山海人俊三傳無嗣以猶子鳳襲
世忠其子也生而神爽志向不凡少長入衛學慕詹
公榮文藝就正之通兵法而兼文藝嘉靖丙戌中會
試武舉贊畫軍機於薊戊子襲祖職加武舉二級授
署指揮僉事撫臣薦管衛印編緝爲後法薦授提調
石門進守備黃花鎮革中璫敘役諸弊進署都指揮
右叅將分守大同中路振揚士氣虜不敢輕犯民遠
出耕獲復請加衛學廩科貢額頻加舊項調應授

宣寧斬獲虜級二十九顆馬駝牛羊八百有奇夷器
二千五百餘陞實級資金幣績給誥命兼節獲捷奏
大臣奏保因邊事回籍對簿旋以西寇棘兵部請授
偏頭叅將是時太原失利人咸不樂此世忠聞命奮
然曰正報國之秋也亟赴之虜寇太原矣世忠所部
軍士先期選策應止存千餘而統之與叅將劉維琥
大同副總兵段堂叅將何堂遊擊張文懿從寧武關
合營追賊軟血誓相救援乃結隊自侯林西行追至
祁縣六支村西遇虜衆督率力戰虜見其軍士壯戰
又力呼騎三千餘合圍四將縮閉營世忠督戰益力

賊亦窘會矢火藥盡世忠憤呼曰我軍被圍諸將背盟竟不相援國憲天刑寧汝違耶復督短兵血戰自巳至酉賊見我兵死傷衆無援久戰力竭遂蹶我營馬爲射死世忠頭中二矢又騎墻獨射被穿袖一箭而死家丁五人往救張臣及百戶張宜俱卽死而士馬亡過半矣嘉靖壬寅七月九日也 上嗟嘆曰醜虜猖獗世忠孤軍奮勇死戰殞身報國忠義可尚先贈右都督賞百五十兩宣及臣各四十兩爲棺殮資兵部議奏與世忠同死銖鍤士先給家屬五兩爲棺斂資以後不分主客官兵但陣亡者如之庶死者如

生生者效死制可且曰世忠忠蓋非常并宣臣卹典
亟議之山西撫臣劉臬按臣童漢臣請重獎卹順天
撫臣侯倫稱世忠原籍山海衛人自陞叅將路由遵
化臣見貌不及衆人初不以禮待及與之坐凜然有
忠義氣今果死節其死非偶然也山西爲死事之所
山海乃生長之鄉宜俱建一祠以酬其忠兵部議如
之請祭六壇爲造墳及賜謚其宣臣無祭例但以死
勤事未宜與祭一壇工部量與營葬其子孫典雖陞
級而身橫羅鋒鏑其情狀尤可惻議與祭一壇以後
不分主客兵但陣亡者如之庶足慰九泉忠魂作三

軍勇氣制可賜祭葬用一品禮謚忠愍祠額曰勸義
而宣臣及軍士如議爲例蓋因其勇烈格主受特
典而廣錫類及於後死者永永時縉紳陵夷武弁久
矣山西撫按三司莫章隆重而激勵以魏諸將不援
者永平鄉士夫闔境無遐邇束芻而弔山海榮等設
位於鄉賢祠哭盡哀雖痛愍乎死事亦共生平事親
孝聞父喪於大同哀毀踰禮爲制限不得躬襄事雖
甲冑從戎退輒衰服慘容抱恨痛終三年母念少子
將順靡不至而閨門嚴肅善與人交故鄉議重之也

遼東都司都指揮同知李任傳

李任金華永康人洪武中襲父爵爲燕山右衛指揮僉事從太宗皇帝起兵靖難以功累陞遼東都司都指揮同知鎮守彰德宣德元年從征叛賊黎利守昌江賊旣獲都督蔡福逼令福至昌江城下呼任等速降任於城上罵福曰汝爲大臣不能殺賊反爲賊用狗彘不若用銃擊之賊懼擁福去賊以昌江爲官軍出入咽喉之地大集兵象用烏龜芭呂公車雲梯來攻任與顧福等留老幼婦女守城率精銳出擊賊燒其攻具賊又築壘射城中任福夜出襲破賊營賊

掘地洞欲潛入城任開橫溝用將軍石擊之入者輒死城中士卒初有二千餘人前後三十餘戰至是死亡過半賊益兵象攻圍日急相拒凡九閱月人力疲困芻糧匱乏而賊益衆以雲梯登城奪其門任福率死士三戰三敗之賊擁象益兵而入任與福不能支皆自刎死時宣德三年五月也內官馮智指揮劉順知府劉子輔俱自縊死城中軍民婦女不受屈辱自死者數千人

族國將軍山東都指揮同知韓公青墓碑

許彬

天地有大經亘萬世而不泯者忠義之氣是也是氣在人履垣途爲忠義之士遇患難則爲死節之臣存亡雖不同所以爲天地大經萬世不泯者固忠義之所存而浩然之氣爲之主也若鎮國將軍山東都指揮同知韓公青者其所爲抱負忠義而浩然之氣爲之主者歟公世家滁之全椒上世以來代有顯者洪武中大父春從文皇渡江以功累陞副千戶旣沒父貴襲陞正千戶守北平攻取懷來雄縣大戰鄭村埧

陞指揮僉事進指揮同知征大同白溝河陞指揮使
再陞都指揮僉事攻奪九門進指揮同知小河之戰
死於敵公以有孩提叔友偕裝指揮使尋以公成立
還其官公英勇過人且善騎射永樂中 文皇征遼
北聞公名特命率邏騎爲前鋒攻殺醜虜賊衆宵遁
閱數日師駐大城陽和復命公率勁騎襲擊之賊望
風奔命不暇宣德改元從 宣廟討武定州旣還賜
賚有加明年甘延諸寇侵邊命總戎征之舉公輔行
公才識敏給能飭邊備嚴號令訓練簡閱有古良將
風旣還陞山東都指揮僉事公操執清慎門無私謂

暇則與賢士大夫講論古今及將鑑武經諸書以資
聞見嘗駐節臨清總督江淮漕運將士不勞而事集
以故再遷今官正統十四年秋虜酋也先輩背逆天
道憑陵中國 太上皇帝親御萬乘逆擊塞外爲權
奸所誤遂致蒙塵賊乘勝長驅履險隘如坦途 今
上皇帝詔凡邊關可通萬馬者悉以重臣守之紫荆
關尤甚重推公往守而以副御史孫祥爲監軍公倉
卒至關關寬敞多岐路守者素不爲備虜衆猝至乘
虛而入不絕我軍至者才什之一衆寡不敵惶惑奔
潰公揮旗招之得勁騎百餘諭以忠義當盡死報國

衆聞之感泣公縱騎突出與賊交戰於升兒灣擊賊
數輩已而賊悉衆來迎公每手劍之數被創復爲流
矢所中公屹然不動自午達申轉戰益力賊圍之數
重欲招公降公大罵曰臊羯狗奴我背忠義而徇汝
乎乃引刀自刎實正統十四年十月十有二日也賊
退之三日收公屍身無完膚顏面如生聞莫不洒泣
風紀近臣有交章言公戰死可憫乞加恩典者上
命陞三級以其子承嗣幼弱命給廩優養於家嗚呼
公承先世之美能自奮立振揚威武以成厥功而中
罹艱危以身殉國可謂見危授命者矣然則公雖死

清爲
中未
反于
此爲
之

後知
元月

而名聞長存若張巡死睢陽余闕死安慶忠義之氣
至今在人所謂天地大經萬世不泯者得不與同一
輒哉前此廣東海寇猖獗捕衆臨城主將張安旣失
利而裨將都指揮王清力戰移日身被重創矢石如
雨左右皆憚不敢近清身憊計窮爲其所執賊素畏
清給以甘言推爲上將否則必誅清罵賊不絕聲又
置之檻車不能死日令人誘之清終不聽惟求一死
翌日就戮清曰汝輩繫我城下呼三司官臨視使知
吾死所賊如其言至是遇害古人謂慷慨殺身易從
容就死難噫若清可謂無忝于公無媿于古名將矣

彼有倒戈迎降開門輸款者而又苟延殘喘以圖爵
賞視二公所處不亦頗厚矣乎公死之四年鎮臯蘭
都帥李進之子文素與公厚恒以承嗣弱幼公之忠
義不白於世憤然於懷比以公務來京乃狀其行實
詣途徵銘將過歷山葬公刻石墓道以彰公之潛德
後之欲知公者當於此焉求之

都指揮同知贈後軍都督府都督僉事周公英

神道碑

馬中錫

陝西總戎都督僉事周君璽成化中嘗分守陽和厥
考都指揮公就養以終非既數年弘治庚戌歲中錫
提學於陝君自持狀泣請銘墓碑按狀公諱英字用
傑其先永平遷安人勝國時有官至右丞者相亨國
初率其家百口來歸朝議嘉之授燕山護衛指揮賜
田宅東安縣故爲東安人父斌永樂初以靖難功讓
其兄或授都督賜蟒衣復還遷安故又爲遷安人生
公及二季某某教以力田讀書於聲利澹如也及漢

廬人有罪公以漢國連姻誑誤與父同下獄父竟死
獄中公讀成萬全開平衛時都督楊洪以遊擊將軍
禦邊公隸其麾下見奇之委長騎隊未幾虜寇邊
令公策擊出境至瓦房嵯馳入敵壘得生虜脫脫白
及驅其駝馬而還正統三年與虜遇人伯顏山麓連
陷其陣擒其酋長也陵台俘獲資械甚衆明年至黑
松林斬捕首虜過當奏功陞副千戶八年擊虜過把
禿河獲其酋那反有文綺官鈕之賜九年勅出陝西
至應昌別兒克之地與虜鏖戰一晝夜生擒平章少
台斬首四十餘級奪其所掠男女牛羊五千以歸陞

正千戶十二年出開平至以克蘇遇虜大戰矢下如雨公突入其陣獲虜達刺孩等男婦檻送京師十四年虜大入寇英宗親率六軍待邊時都督洪進爵昌平伯授節鎮宣府以公隸都督楊能護蹕至大同與虜遇於栲栳山公擒生虜則不下者以獻命誅馮牙旣又從右叅將江廣擊虜至乾庄兒堡斬首虜猛禿兒麻等還奏捷行在土木失利公身被重創力戰得脫天子北狩京師戒嚴景皇帝以郕王監國徵洪兵勤王公亦褻創赴難至京師洪進爵爲侯因面陳公謀勇可任且賞未當功遂陞指揮僉事後從

洪禦紫荊諸關與虜連戰彌月因大敗其衆生擒酋
虜阿歸等復斬首百餘級僞太師也先乃率衆北遁
明年改元景泰陞指揮同知二年修前乾庄兒等處
戰功陞指揮使其年洪卒一軍盡還宣府獨公被旨
留京師註府軍前衛天順改元 英廟復辟都督能
以進爵武強伯奏公栲栳山擒虜馮牙之功未賞陞
都指揮僉事五年又以平逆臣曹欽功陞都指揮同
知六年公年漸老盡以其橐鞬戈甲付璽曰汝繼吾
志璽奉命惟謹襲府軍前衛指揮使累官後軍都督
僉事贈公如其官母李氏贈夫人嗚呼世人視友於

之愛如土苴弦誦者不免也公父讓爵一節旣無媿
子臧季札之義卒冤抑以死公遂能挺身萬死之中
策勛百戰之後則天之報公者不誣耳余未及識公
而屢見公之子議論疊疊好文愛士卽古所謂儒將
不能遠過則得于公者不淺古稱世祿之家鮮克由
禮公家膺厚祿百餘年而魚魚雅雅乃若此豈可以
例類之哉

浙江都指揮同知白君弘墓志銘 邵寶

君姓白氏諱弘字宗大別號松庵其先出元部落有
把思台者以功受王封國初有士願者始受籍永平
之昌黎君曾祖也君祖誠從文皇靖難有功後再
以克虜功累陞永平衛指揮使君父廷玉襲嘗推總
三千營事俱贈如君官母蘇氏封太夫人蘇氏娠君
有夢祥旣而君生器宇果異六歲讀書日記數百言
與羣兒嬉有一誤墮溝中者衆奔去公獨垂繩援焉
十三能屬文選補武學生從翰林劉先生戡受易學
三應科舉更習書經司馬余公子俊保國朱公永陞

試弓馬策畧屢優獎之時京營候參帥者若干人君爲之首弘治戊申始開武舉君舉第二陞署都指揮同知贊畫方畧於大總兵所加俸三石未幾實授癸丑冬有舉君久諸戍務者以前官總理神機管事司馬馬公文升一見稱材且以久滯爲惜尋銓今官理軍政兼屯田清軍馬政諸務庚申歲總漕都憲張公敷華以君廉勇協望舉總浙清君疏八事上備朝議多見施行居二年鎮巡會推邊帥疏上君名奉勅總督海道今都憲洪公遠時以憲副與君同事葺城于圯浚濠于淤抑强警惰以御守卒先是有屋於海島

者往往招攬而私鹽竈燒疑於烽火君悉去之他所
施罷皆當利弊又以餘力設師塾以訓武胥居歲餘
海道寧肅正德改元以上登極恩使來致白金及
金獅緋衣之賜明年兵部以荆楚地重乃移君掌湖
廣都司事君鎮以簡靜南人懷之巡按御史李君天
賦嘗以堪大將舉是歲三法司奉勅蒞獄于藩有讎
死而稱冤者君得其情正色言之不少畏却得釋者
二百餘人又明年君以疾請於巡撫都御史陳公鏞
乃檄還君於浙越三年江西盜侵衢州鎮巡謂公練
達委以疆事君極力備禦未幾與疾還卒是爲癸酉

六月四日享年六十有五君雅好吟咏與客倡和
成卷帙有松庵集藏于家

佐擊將軍贈都督同知謚忠壯清渠宗公禮傳

清園集

嘉靖中島夷內訌沿海處亡所不蹂躪時久不見兵
革而閩浙直姦人陰內主之與相勾連亂益甚迨甲
寅乙卯間嘉湖蘇松之禍棘矣天子震怒有所誅
逮不任事者特建大將旗鼓責以驅逐掃蕩而選諸
偏將軍佐之樞臣諭薦公勇武饒材畧令統所部民
兵千詣浙直軍門聽調遣爲應援計寔乙卯之十一
月也公聞命慨然曰古以馬革裹尸自誓者豈異人
任哉此行所不能自効寬上南顧憂者非夫也卽日

兼程行所至秋毫無犯丙辰正月抵松江黃浦開創
府命止管禦新場賊時新場賊約千五六百人漳潮
軍紹爲賊翼者若土人入倭爲鄉導者不下三千餘
人皆兇饒而被虜供其使令者又二千餘人於是新
場百里間皆賊藪兢兢虎視公數奮兵遇浦挑戰有
金娘子橋八師庄下沙諸處賊先後被創堅守不敢
出至三月二十三日探柘林新城堡新倭二百餘登
岸縱掠公提兵掩擊賊奔潰次日追至劉津村又新
倭二千餘擁衆來公復提兵掩擊賊又奔潰會新場
舊賊與新至者合猝與我兵遇公分騎兵百爲兩翼

用箭圍射當獲十數人又次日乘勝攻破新塲賊巢
賊大慟倉皇奔新船遞去旋奪回被虜婦女六百餘
口而新塲諸穴悉平前是以南人柔脆不任戰倭益
張公婁剄之聞者相顧愕眙以爲神四月總督胡公
檄公隨賊所向追勦之連有吳江嘉興之勝十九日
兵至崇德縣探倭至皂林勢且犯杭公兵邁往皂林
進西石橋止營禦之二十三日倭萬餘夾河來戰公
統兵不滿九百人自寅至辰所殺傷多賊敗去頃之
復來戰自辰至巳又自午至申賊番休來攻三戰三
北死傷無算軍大振會石橋前鋒中賊砲橋失守公

被重傷猶暴創奮臂戰徒以九百當萬人衆寡遠不敵兼盡日乏食軍無後救者公力竭仰天疾呼曰死當滅賊以報國遂遇害乃是日之暮也總督聞其事於朝 肅皇帝亟下詔褒之贈都督同知廕一子世襲指揮僉事予祭大壇諡曰忠壯建祠皂林額曰褒忠命有司以時饗焉夫公以身殉敵視聞命誓語如左秀然璽書煌煌光賁泉臺延世之賞與國同久嗚呼公爲不死矣公宗氏諱禮字周道別號清渠其先蘇之常熟人國初有阿佛公者從軍北征隸於燕已卯隨 成祖征討鄭村壩陣亡以弟成補授總旗白

溝河有功授應天衛世襲副千戶成生鑑鑑生浩浩
生椿卽公考也妣韓氏以公子彭年貴考贈都督僉
事妣贈夫人公中嘉靖己丑武舉由祖職加二級署
指揮僉事歷本衛軍政大寧都司北直民兵叅將神
機營佐擊歲積勞勩因以佐擊奉 命禦倭配石氏
以子彭年貴贈一品太夫人生子二長孟言弱冠隨
征柘林有功授祖職副千戶任至京營巡捕叅將次
卽彭年廕指揮僉事中萬曆庚辰武舉有文武才自
僉衛事至南京前軍都督府都督僉事以三十二年
恩詔贈公榮祿大夫公之未生厥考艱于度膳於神

正德庚午元日夢梓童帝君引一金甲神呼其名曰
以爲汝子初五日生公迄丙辰卒時年四十有七語
云其生也有自殆公謂耶沒既久都督公來留都與
余晤語問及世德乞余文爲傳余念公精忠大節載
在實錄合于史大書特書例故詮次其事俾後之人
得攷鏡焉若乃生平孝友之行暨子孫婚娶之系則
家乘備紀之不具論

左君弼傳

黃金

左君弼廬州人元季壬辰羣雄倡亂君弼黨於彭祖聚衆數千未幾彭祖敗君弼獨據廬州太祖遣將征之不克癸卯三月僞吳將呂珍引兵寇安豐君弼助之上怒帥諸將擊珍敗走遂攻廬州圍之三閱月城將下適陳友諒寇洪都急上命解圍援洪都友

諒既滅復攻廬州君弼窮蹙棄城走汴梁元將李克彝使守陳州吳元年二月上遣使陳何以書諭君弼曰曩者兵連禍結非一人之失予勞師暑月與足下從事足下乃舍其親而奔異國是皆輕信羣下之

言以至於此雖悔何及今足下奉異國之命禦彼邊
疆與予接壤君欲獻計帥師侵境其中輕重自可量
也且予之國乃足下父母之國合肥之城乃足下丘
隴桑梓之鄉寧不思乎天下兵興豪傑並起豈惟乘
時以就功名亦欲保全父母妻子於亂世足下以身
爲質而求安於人既已失策復使垂白之母糟糠之
妻獨居寡處各天一方朝思暮望以日爲歲足下縱
不以妻子爲念何忍忘情於老親哉功名富貴可以
再圖生身之親不可再得足下能留意於是幡然而
來予當盡棄前非仍復待以故舊則足下於天理人

心舉無不順矣君弼得書猶豫不能決後乃歸其母
於陳州君弼感泣洪武元年王師平山東西指汴洛
君弼納款降 上命爲廣西衛指揮僉事君弼自效
從征克捷二年冬十月左江上思州蠻賊黃英傑聚
衆萬餘寇鬱林州知州趙鑑同知王彬集民兵拒守
賊攻圍半月不下廣西海北等衛官軍來援賊夜遁
追至上思州境破之賊走還仍聚黨不解事聞 上
命君弼爲副總兵討捕英傑與其弟英覽逃之十萬
山七洞口君弼追及之英傑陣死英覽就俘餘撫安
之自是兩江擡酋膽落矣四年春又以平溪洞蠻獠

有功賜絳帛二十疋

浙江都指揮僉事余斌傳

浙江都指揮僉事余斌直隸廬州府合肥縣人前浙江都指揮同知成之子年弱冠襲職爲處州衛指揮使戎務之暇留心經史延禮文士商確政事宜德五年調除定海衛自建義學延師儒令官家軍民子弟願學者咸肄業焉公暇躬詣考閱而激勵之務期有成以廉自持自撰公勤廉謹四銘書於廳事以自勵城南海口有大浹渡常覆舟溺人自撰文祭其神後遂無患六年仍調處州衛捕盜有功七年陞浙江都指揮僉事九年冬以疾卒年裁三十有二衆咸惜之

都指揮僉事陳公儀墓志銘

王直

公諱儀字叔戔姓陳氏廬州合肥人故奉天朔運推
誠宣力武臣特進榮祿大夫柱國平江伯追封平江
侯諡忠襄諱宣之子也母夫人湯氏曾祖諱重一不
仕祖諱聞官至成都右衛指揮同知以忠襄功皆贈
榮祿大夫柱國平江伯妣皆贈夫人公自少端重謙
和無綺紈之習好文章喜翰墨務窮其所至欲以自
立於世當在當時論勲臣子弟有文武才具者必稱
公永樂中宣宗皇帝爲皇太孫詔選良家子入侍
公與焉上雅知其才特見親任有所顧問必盡誠

以對漢王蓄異謀公亦數言其姦狀上臨御之朝
果反凡其所言皆驗及事定以俘獲賜羣臣公得與
侯伯等蓋異恩也車駕巡邊出喜峯口公以曉勇選
在前適虜寇犯邊多所殺獲其後屢出巡邊公皆扈
從有勞績今上嗣位求賢將用之成國公朱勇等
交薦公詔大臣試所業公言出奇制勝之道皆傳古
兵法及觀其騎射從容上馬引弓連發連中諸軍皆
大呼稱快同就試者皆自以爲不及遂擢爲勲衛日
帶刀侍從益以忠謹見稱瓦剌使來朝貢將歸豐城
侯李賢受命率兵送之言於上曰今兵遠出慮或

有緩急願得勲衛陳儀者偕往可計事 上卽命與

之俱出塞二千餘里而還虜寇朵兒只伯擾西鄙公

上言請於寧夏甘肅簡精銳俟春暖俱發諸道並進

且先約瓦剌相犄角殘虜破敗之餘必就擒戮此萬

全計也 上然之正統五年麓川叛 上命定西伯

蔣公貴兵部尚書王公驥往討之公亦在行明年抵

其境蒲羅諸蠻作亂道梗不通公率衆直搗巢穴擒

其首惡殺數十百人諸蠻遁走師遂進拓降鎮廣州

陶孟刀門棒殺敗賊黨刀賴燕刀門顛等功居最陞

錦衣衛指揮同知其冬攻克曼邦永怕孟雷諸寨斬

二千餘級又領軍獨進抵南甸所向摧靡駐營馬鞍山下爲大軍後援遂以成功師還永昌蔣公王公命爲文勒諸石以彰聖德還朝論功陞指揮使賞賚甚厚明年復往征師踰貢章功多陞都指揮僉事留守雲南積糧治兵爲後圖而公乃以疾終正統乙丑四月二十八日也生於洪武甲戌四月初九日享年五十二歲之還也葬應天府江寧縣大山之原附於先塋之次

都指揮僉事江公洪墓碑

吳寬

英宗睿皇帝在位方十四年海內富庶號稱極治獨
北虜屢犯邊爲鼠竊之計上思所以攘却之者乃
下詔躬率六師往征師行失地利一時將校奮勇爭
護乘輿而山西等處署都指揮僉事江公與其弟子
四人同日死之時正統己巳八月十六日也公諱洪
字朝宗其先廬之合肥人祖浩從高皇帝起兵取
天下累功至明威將軍太原左衛指揮僉事子孫世
襲并得贈其父大海如其官既沒子濫嗣而公則濫
之子也公在太原旣以才勇知名宣德末選總京營

左翼久之陞署都指揮僉事仍守山西旣而從駕北
巡遂死於難公旣死朝廷卽命其子湧嗣職所以慰
公於身後者甚至公爲人偉軀幹沉毅有謀御下紀
律嚴整而推心任人能與士卒同甘苦蓋有古名將
之風尤善騎射輒命中流輩莫與比者性素儉約食
候稍盛卽撤去而奉母劉氏必極其滋味母疾更割
股肉作糜進之疾獲愈人以爲難其配陳氏贈都指
揮僉事實之女寡居能以禮自守教子湧有法湧亦
有將才嘗從征老軍營功多實授都指揮僉事署都
指揮使事以其官復贈其父若祖而贈祖母淑人封

母太淑人於是湧痛念其父嘗憤然有滅虜之志既奉公遺衣冠葬於先塋求予表於墓嗚呼 睿皇帝之出所以爲宗社稷慮至矣蓋有周張皇六師之遺意而非後世之爲游田者故當時死於難者多公之事若同於人不足書獨惜平日號士大夫者棄君父生還以取富貴有媿於王孫賈之母者不少矣公之事不書可乎夫死者衆所難生者衆所易能爲其所難而不爲其所易公之所以可取者在是而予爲之表者豈惟慰湧之孝思哉亦惟媿乎若人焉爾

山東都指揮僉事贈武靖伯趙公本神道碑

彭時

今上皇帝嗣大歷服董正治官文臣武將各廼有功而武將再征再克勲名播於中外無間蓋莫踰於武靖侯趙輔者成化紀元之歲侯以都督受命帥師征廣西大藤峽賊直搗其巢砦平之明年凱還朝廷厚錫爵賞追封其父都帥公以上三代俱武靖伯母沈氏爲太夫人又明年征東夷平其地捷報方至而太夫人棄世矣侯班師入覲既卽執喪如禮將奉太夫人之柩還葬鳳陽先塋乃述公夫人德善并家世屬

子文之刻石神道以昭示無窮公諱本字宗立姓趙氏世爲鳳陽人曾祖仁追封天水郡侯妣李氏追封天水郡夫人生六子曰均祥曰德勝曰鑑曰端曰某曰裕均祥與某俱蚤卒餘皆忠義才武奮身從皇帝定天下德勝功最多官至懷遠大將軍僉江南等處行樞密院事拒僞漢陳友諒中流矢卒於南昌贈開國輔運推誠宣力武臣特進榮祿大夫柱國同知大都督府事梁國公諡武桓配享廟庭鑑官至弘衛指揮僉事端沉鷺剛果屢從征伐積戰多功歷陞福建興化衛指揮僉事居六年致仕以其子麟代

職逾年復召拜鎮國將軍廣東都指揮同知後赴召
入京賜資還鄉卒裕興化衛正千戶端卽公之祖麟
其父也並追封武靖伯祖妣劉氏妣曹氏李氏俱夫
人公生於父葬之日賴母氏訓育以成旣長襲任直
隸邳州衛指揮使卽督屬造海舟創新開運神木以
營宮殿才能卓卓著稱其於戎事尤爲練習凡從征
沙漠者四靖內難者一俱以功獲褒賞久之用薦陞
山東都指揮僉事領兵更番衛京師撫馭有方得士
卒心尋命回治司事歲甲子山東旱饑戶曹奏准停
支屯田卒月糧公曰支尚食不給不支則轉乎溝壑

必矣仍發廩放支僚吏執不可公曰有罪在我因以聞於朝卒如請賴全活者甚衆未幾以疾卒於官公爲人器量淵洪風采凝峻忠孝出乎天性以父不逮養事母極其誠居喪哀毀踰禮蒞官行政寬猛得宜處僚友和而正待僕從嚴而恕馭衆臨敵善謀而有勇公餘手不釋卷雖處軍旅亦然故於義利之分古人成敗之迹知之甚習而見諸行事率有可稱其教予不專於武藝必欲其通文學恒敬禮賢士俾知所嚮慕焉尤好施予親戚故舊有婚喪不能舉者輒捐貲助成之不少有德邑其仁厚又如此享年五十四

遼東副總兵韓公斌神道碑

費宏

公諱斌字廷用姓韓氏由遼東寧遠衛指揮使屢用
薦爲將守邊其在遼陽最久功最多 今上二年公
老而卒且葬幾十年矣遼陽人思之願公廟食其土
詔可之額曰褒功都司官歲以春秋謁祭而屬予銘
之公少孤年十六襲職蒞其衛事已若素練焉者嘗
禦虜小團山能突陣馘其一酋以敗之天順初陞遼
東都司都指揮僉事備禦寧遠虜復入小團戍將領
官軍陷焉公馳赴手刃數賊圍遂解時義州屢失事
總兵官成山伯王琮被勅責恐甚公請當先自効琮

以五百人屬公拒賊遇之於八塔兒賊衆四千圍我
關其一面或幸焉公曰是將誤我不可忽也令營中
聯馬死關而出生擒一人斬首十三級獲馬五百捷
聞受綵段白金之賞尋奉勅守備義州協贊懷柔伯
施聚築堡爲耕牧護坐寧遠誤事貶二秩巡撫都御
史滕昭巡按御史常振刑部主事丘霽惜其才交章
薦之禮送至京命署都指揮僉事充叅將征四川未
行捷至留京營督練尋充左叅將分守延綏西路時
北虜毛里孩擁衆十餘萬入定邊營公率五千騎伺
其歸擊之環縣擒一人斬首六十七級比收兵虜衆

猝至圍之數重約日出將蹂躪焉謀以告公度衆寡
不敵難久支出不可緩今我軍悉木白以自別或謂
東南圍薄可出也公曰若虜將弱我而乘之矣乃向
虜衆奮呼而出有所斬獲公戒勿顧北出猶存七級
焉已而虜復入花馬池有衆三萬公度其難以戰勝
列陣城下出精兵三千陣車前賊知有備不敢近成
化三年建州賊數擾邊都御史李秉薦公武畧出衆
深知夷情勅改充遊擊將軍馳驛還遼領右哨從出
清河抵其巢斬首二百餘級俘男婦一百七十餘口
論功實授都指揮僉事以遊擊分守遼陽諸地明年

改充副總兵分守開原兼提督遼陽鎮巡諸官以爲
遼陽東南境與建州接守將非專任弗可請復遼陽
公與衆籌必堡兵而後能守親歷緣邊相賊所出沒
處創東州馬跟單清河轍場綏陽及鳳凰鎮夷草河
湯站等堡密烽堠增戍卒自撫順迄于鴨綠南北幾
千里聲勢聯絡居民因得墾灌莽田之屯利日廣而
虜深入之謀殺矣九年賊屢犯廣寧總兵官歐信會
公出義州直抵興中斬首六十二級論功陞署都指
揮同知廷臣會推天下武臣可大將者三而公居一
焉賊嘗入清河堡匿深谷中以數騎薄城挑戰將佐

爭欲擊之公曰此餌也勿貪已而伏果起公乃背而陣番休更戰賊旣遁復出驂河十岔口等處搗其巢斬首百餘賊大舉寇靈陽而還也邀其歸路值淫雨連日令士卒下馬徒行多怨者公曰馬疲則遇賊不可用矣我豈欲勞人乎至將在峪部分將士舉號火縱騎追奔馬有餘力遂斬六十三級公紀律嚴明下莫敢犯顏中流矢能權詞以安衆心部卒有被矢中目者亦能堅立不移拔鏃還射倉猝遇敵必謀而後戰緩急合宜前後八九年屢與虜鬪未嘗敗衄爲同事忌功者所中坐累復貶三秩知者寃之十五年撫

法

寧侯朱永等受命征建州公同總兵官侯謙復爲右
哨出鴉鵲關抵泊珠江斬首一百五十級俘男婦三
百八十九口虜酋有宋管只八者據山險欲夜劫公
營公令譚大呼曰韓馬法在此汝尚欲爲偷乎馬法
者虜所謂大人也賊衆願一見公公免胄示之皆棄
弓矢拜馬前請降軍遂還公度暮至黑松林賊必有
後邀者約謙軍其地以待之而謙徑先歸公至黑松
林賊果突出公急令立營一麾而定賊不能擾其料
敵應變類如此撫寧卽軍前奉欽給勘合陞公指揮
使捷奏上以公當一面復陞都指揮僉事明年北虜

侵開原而建賊復擾遼陽時公遭讒淹繫上素知
公薄其罪釋而用之俾職任皆仍其舊且命亟行北
虜聞公至卽遁去十七年公乃詣撫順關招建賊卜
花禿等以恩威諭之皆叩頭誓無再犯公知虜情多
詐嚴兵麟場等堡以備之累以擒斬功受賞二十三
年追勦朵顏虜寇至半邊山獲原掠人畜而還上
念公久勞特賜蟒衣一襲大理寺丞李介通政使田
景暘先後各薦公可主將廷論多歸之者而公浩然
不可留矣弘治二年公確辭至再遂老焉於時年甫
六十日置酒會親賓以爲樂時政物評未嘗掛口後

十有一年得年七十有二而卒公生長邊陲身長七尺有咫膂力過人精技射多智畧善以寡擊衆然不恃已長每戰必叅衆謀而用之與士卒同甘若嘗雪夜追賊道卧以伺禁毋爇火一軍未食不輒先稚童儒生遇暇必延致誦說史傳故武功之立遂爲東陞世將有以也夫

陝西都司指揮僉事張公鵬霄行狀 王維楨

公諱鵬霄字圖南葵軒其號也上世直隸揚州府江都縣人曾大父英自瓜州渡江從高皇帝取天下庚申事定授指揮僉事世襲居六年上忽詔英曰爾隨朕起兵歲久勞多當封之爲侯英辭曰臣年老子孫薄福卽指揮足矣乞勿授上賢之賜緋袍金帶留侍京朝英傳稱稱初慶陽衛尋改西安後衛奉高皇帝命平雲南會冒癘疾作上賜佩刀及家人二戶慰之夫稱者葵軒公之大父也稱有子二人曰煥曰敏文皇帝興詔煥隨侍煥無嗣敏得蔭其

官敏稱長者有器度是爲公父配周氏以天順癸未
閏七月八日生公公脩軀通臂豐頤疎髯面如紫玉
目若朗星正視不見耳聲吐如鍾尤精騎射壯膂力
年十五襲官初將兵守寧夏已改守榆林已推衛僉
書已又陟掌衛事並能舉職效才一時寮佐咸推伏
莫及公由是有名 敬皇帝時北虜擁衆入寇大將
武安侯檄公應之公率騎兵二百遇敵滿受堡公曰
衆寡弗當也殊死而已令諸軍下馬馬盡入堡步戰
移日公督擊愈厲忽一虜朱甲青錐揮刃突來公率
壯士許朱三直前斬之朱甲青錐者蓋酋長云虜懼

通我軍無傷事聞 天子壯之賜白金綵幣若干是
時他將兵孔壩溝者全軍皆沒坐免者衆人以是咸
服公勇而公有名少傅蓬庵楊公者 毅皇帝時來
總制三邊事徵公幕下咨兵畧建圖畫計山川夷險
之形暨奇正分合之勢炯炯在目楊覽而奇之太息
曰大將材也欲大用不果後環慶地方弗靖有才總
制者知公疏公守備環慶陞畧都指揮僉事至卽懸
賞募兵招商實廩斥堠繕飾城浚隍又奏歲增銀布
時犒士卒環人安之寧寘鏑亂諸路兵會靈州公謀
諸將曰賊據城不出黃河伊邇可引灌使下脫南渡

河患不可測矣於是令善渡者若干人夜奪河船盡
使不得南賊聞船奪渡不克乃內自相殺公因攻之
約諸將協應賊遂平事聞 天子降勅褒諭賜白金
若干兩及紅金虎豹衣二襲陞都指揮同知公以署
職加級辭不受居無何擢掌陝西都司事都司事故
閣相踵莫之或振公憤然曰不振不立於是刷姦剔
蠹著令布條咸斬斬有實軍吏相縮無敢犯都司稱
治久之蜀中盜起流擾漢沔湘洛間橫不可撲或有
薦都司者而大司馬辛菴彭公亦檄公督三省十九
路兵將討賊公卽督三省十九路兵將討之渠魁廖

麻子喻老人相繼授首俘馘以萬計公亦親斬六級
其時論功第一有王給事者來紀功諸將謂紀功率
旁門入獨公入紀功中道王銜之乃獨掩公功弗上
又分六級三陣同事者皆晉秩公止得賜白金及金
衣二襲論者憾之又平關中盜斬獲千二百有奇又
平洛南盜洛南盜負山孫副使難其剿向公念曰此
無漢南鵠兒故事耶公哂曰未也可二十日擒此捷
才十九日孫大服又平石門山回賊擒其首田迪遂
盡收餘黨歸屬冬雪沒徑馬跌傷足公以是不出居
數年今天子興復起運菴公總邊事公以楊雅知

我再出董旅期大得志於時楊壯之嘆曰孰謂廉將
軍老尚可用也令代巡諸邊乃卽疏公掌寧夏都司
事不報公曰今之仕宦者余知之矣不踐徑率貶折
爾予終不能踐徑貶折宦而媿于志楊公去遂杜門
謝事後中丞王公御史楊公王公連疏薦之竟不出
公才氣卓犖屢著勞伐人謂三錫五等之階超足可
至卽公亦自謂非俛俛人下也乃顧連蹇阨塞不獲
大致顯融豈李廣不侯數信奇耶抑時值嚮吹而公
操絃邪嗟哉公之得謝他日惟課園觀書絕口世故
歲時家廟展祭畢坐堂上令兒孫及家衆羅拜堂下

訓以內政甚肅生平不疾卒日猶三飯如常得年七十有九先公守環時夢一老人皓首龐眉兩手捧紅羅幌公且曰與公約之得八十尺未少不足人咸謂公壽徵由今觀之信有數邪公慷慨峻爽絕機械論事可否面裁琅琅傾聽好猜古昔說先王與言遽旨超悟自得卽章縫之士猶或後焉余同年渭南有劉子文甫臨潼有任子伯玉二人者曩游長安與安世交因獲見公爲余道之如此而安世又稱公爲指揮總中軍時有大監劉雲者鎮守陝西肆誅求齊公爲附公面折其非法數事執不從劉怒令無籍毀其宅

又僉書都司時能立判冤訟當道有滯獄皆以委之
無弗得其情者此豈非豪亢自負敏達不局者哉

王邦直傳

朱睦㮮

王邦直字國寧磁州人也父潯府谷知縣邦直生而
驍脇有神人稱王千斤云弱冠補州學生業已食廩
矣而非所好也乃學騎射窮韜畧有求試請纓頸繫
單于之志日擐甲令左右奉弓刀侍其父見而異之
人之潯自府谷遣歸遇虜于道發一矢不中中石石
爲之泐虜取矢視如扛駭焉遂不敢近嘉靖二十一
年邊警頗急詔舉才勇於是兵科都給事中戴夢桂
薦邦直於朝命詣大同督義總督侍郎翁萬達與語
甚驩乃延入幕府以國士遇之解衣授食分坐談邊

邦直亦願以肝膽相歸而益以義氣自負也再踰年
謀報虜將入寇萬達使邦直同叅將張鳳率義兵五
百人出塞外覘視抵鴉鵒峪窺山上賊數十騎往來
邦直蹙而擊之無孑遺者復見山下賊百餘奔焉邦
直與鳳謀可悉取殲之從者曰千斤將軍功奇矣可
勿逞竟飛騎以往踰谷口數里忽至大陸溝中伏兵
約三萬餘騎列兩大翼而陣邦直激衆奮勇以矢石
急擊而身自引弓射殺賊首賊憤合圍七重戰七日
夜邦直斬虜千餘級會天雨雪矢食俱盡邦直潰圍
而出檢義兵從者惟王國順一人耳邦直嘆曰吾與

汝等本欲立功沙漠以報主恩不意衆寡不敵損亡殆盡且風旣亡而吾獨存恥也異日何顏面以見軍門邪遂策馬復入賊營力竭被害虜固壯邦直環其尸相視嚙指翌日遂引退我軍與其尸而歸旣而有自虜中還者云諸部落皆悲泣謂是役死傷不勝紀自此虜數年不復敢犯亦懲之之故初邦直之死也諸鎮士吏知與不知皆爲盡哀萬達親爲文祭之已乃上疏請錄恤又擬張世忠故事乞謚表庸官爲立祠與張鳳並祀而以李尚倫等人人附焉詔從之贈邦直都指揮僉事建祠以祀仍磨子化熙爲潞安衛

正千戶世襲

論曰人臣有封疆之責統馭之任遭世多故或戮力
戰禦或倡義嬰城不幸隳敗則委身而殞固其分也
然非忠誠感發志意堅定眇不偷生而鼠竄矣良林
抗聲罵賊慷慨就戮寧國奮勇殲虜視死如歸均之
不失爲烈丈夫矣

福建等處都指揮使司掌司事署都指揮僉事

張君建節墓志銘

王世貞

余所友者張將軍元凱爲布衣欽覓歲甚懼一日悴其容而造余拜且請曰幸有以銘吾父昭毅君之墓問其卒十載所矣而猶未葬也已又其出其友王子百穀之狀曰是所待以不朽者二先生夫余而以元凱友也則銘之余而以百穀狀也則銘之然而昭毅君故先百穀而識余者也按狀君諱建節字子行別號咸虛其先鳳陽五河人六世祖得從高皇帝起義爲徐州衛千戶有二子長祥襲而遷陝西慶陽衛

指揮同知次真從 文皇帝下金陵以宿衛薨脊授
徐州衛指揮使調浙江臨山衛遂爲其司都指揮屢
遷石軍都督同知填浙如故有子智以病廢孫英襲
調蘇州衛自是兩家兄弟俱重於秦吳間有世官而
其居吳者尤著英亡子弟葵襲葵生叙叙生瑀爲君
父瑀有文武才握衛符者垂三十年而屬世承平弗
獲以功名自顯見君生七歲而喪母顧淑人表毀如
成人蔣淑人來稱母謂君能子矣是時張氏以俠聞
江南甲第樓觀假山池前堂羅鍾鼓立曲旃羅綺曳
地出從平頭奴駿馬而君於其間獨布素自喜又日

夜習讀經史爲書生業父珣內奇之謾曰家世村官
介士不於三尺取封業而至齷齪鉛塹爲君跪謝曰
將相不偏廢也且鉛塹三尺所受使父珍語屈而御
史視學者已試君高等補郡諸生自是試輒傾其諸
生以至有旣廩而其於應天凡三試輒不利最後父
珍卒當襲君請於御史得如諸生制終喪而襲御史
善之後遂爲指揮使當復應武舉試應試者謂所射
策論難毋若君何卽君射亦無若吾屬何也已君騎
而馳射鵠耦射又鵠乃大驚嘆遂爲第一人君凡三
試而兩爲第一其最後以策太奇忤御史猶第二而

至部試輒數奇不第如諸生時然御史天民薦之已
御史魏復薦之後與都御史黠合薦之御史洛復薦
之他御史先後尉薦至再三俱報聞而君之爲指揮
也蓋視衛符如珍時嘉興所者故衛屬也其舍人兒
張生富而入貲爲衛指揮欲列坐視事君怒曰卽不
肖從諸將軍其先皆自汗馬得之何至媚賈人骨哉
顧左右移張坐勿設張大媿夜行金三百爲壽公指
其門曰此非入貲所也則以緹帥陸太保炳書來解
君弗啟封曰吾賤不識陸公也衛故與郡鈞禮它指
揮卽不敢以鈞禮請而君獨行之自如郡守丞初亦

不自得徐察君衛事治而所接談議斷斷見風采至
與之推風雅觀酒德久而非君無歡也時暴有倭警
都御史蔡公倣諸將軍樓船出海錯愕不敢發君解
印綬佩其副曰吾難吾綬哉促鉢帕韋附注殼而從
少年蒼頭數十人前薄賊賊爲之披靡矣而還南京
總漕行都指揮事以去君旣持廉無所射徇而能察
用其下卽偏裨少不法袒而受杖惴惴受約束以故
其潛績獨稱諸帥冠踰年遂爲真而令郎陽都司事
而章中丞煥者君故人熟知君才數令行部上便宜
諸非軍事而疑者亦輒以屬君襄陽大俠鄭貞險數

壁亡命匿稅田百千頃官數捕不得君單騎入其巢
縛之出衆睥睨莫敢動遂置鄕法而沒其田中丞上
君績遷長福建都司亡幾而倭薄省城大震諸守帥
皇恐不暇食飲君與其舍人雅歌投壺自如撫臣者
失其名司而難之而君所治虎落躡石勁弩長戟守
具精甚而所將士又選賊望見君輒卽不敢壁而移
壁他所旣賊退撫臣乃更媿服君以三千金檄君治
兵甲人或謂君名爲兵甲耳君誠能捐其半爲撫公
壽必德君而其半尚可橐也公謝不可日夜趣治兵
甲咸犀利先期報撫臣乃大失望而以君募兵匿籍

得六千人更用爲援而劫之君坐聽君乃大喜曰今而後庶幾還吾書生哉卽日歸解橐中裝直可二百金悉以推其孽弟建寅而躬理泉石花木之業與故吏部郎較祥徵君章憲使美中軍謀詩酒以自娛讀者謂大司馬尺一旦夕下君而君以羸疾逝矣君逝以嘉靖丙寅距其生正德壬申春秋五十有四所著有毛詩問難四卷北游錄二卷軍政條約四卷戰守說各一卷問漕集二卷續漕志二卷楚游稿一卷守園說一卷樂志園集四卷藏於家